

Date – 25/08/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. DoNER Minister Jyotiraditya M. Scindia chuan rel kawngin Mizoram khawpui Aizawl a tlawh tur chu a lawmpui thu sawiin ram zalen hnua hmasawna ropui tak ani tih a sawi.
2. Mizoram Mit pe tura intiam mi 9231 awm tawhin mit thlak ngai in ziaklut mi 391 an awm tawh a, kuminah mi 32 in an mit an pe tawh a ni.
3. ZPM chuan vawiin khan Dampa Bial MLA by-election lo awm tura an party candidate turin Pu Vanlalsailova an ruat thu an puang.
4. India leh Fiji chuan vawiin khan rinmena thuthlugn chi sarih an ziak.



BAIRABI-SAIRANG RAILWAY LINE

DoNER Minister Jyotiraditya M. Scindia chuan rel kawngin Mizoram khawpui Aizawl a tlawh tur chu a lawmpui thu sawiin ram zalen hnua hmasawna ropui tak ani tih a sawi.

He thu hi social media kaltlanga sawiin Union Minister for Communications and Development of the North Eastern Region Jyotiraditya M. Scindia chuan kilometre 51.38 a thui Bairabi leh Sairang inkar rel kawng zawh fel a ni chu lawmawm atih thu sawiin rel kawngin Mizoram khawpui Aizawl a tlawh tur chu a lawmpui takzet a ti a, ram zalen hnua hmasawna ropui tak ani tih a sawi.

Prime Minister Narendra Modi an thla thar September ni 13-a a hawn tur Sairang leh Bairabi inkar Rel kawng chungchang sawiin Chief Minister Pu Lalduhoma chuan Pu Satish Kumar, Chairman & CEO, Railway Board chu inrinni khan a chenna inah kawmin inbuatsaihna hrang hrang an sawi dun.

Chief Minister hian Railway lamin National Highway atanga rel kawng panna kawng an laih leivungin National Highway side drain a vur avanga harsatna chungchang a sawipui bawk a. Side drain te siam tha a, concrete slab tea khuh turin a hrilh a. Railway Compensation la chin fel loh an nei nia a hriat thu sawiin a rang lama chingfel turin a lo ngen a ni.



GOVT. AIZAWL COLLEGE FOUNDATION DAY

Chief Minister Pu Lalduhoma'n Mizoram State University din tumin hma an lak thu a sawi a, kum 2036 hmaa neih fel hman an tum thu sawiin Administrative Building chu Luangmual ah sak ani dawn a ti.

Vawiina Government Aizawl College in kum 50 tlin lawmna, Foundation Day a hmanpui na ah he thu hi a sawi a, Pu Lalduhoma chuan zirna sang zawk atana sawrkar hmachhawp hrang hrang sawiin Mizoram State University chu kum 2036 hmaa neih fel hman an tum thu a sawi.

Chief Minister chuan Mizoram Engineering College, Lunglei Pukpuia mi chu kum 2026 atanga zirna tan tumin thawktu thar mi 63 an la dawn a ti a, a hmunhma thawm that nan tun hnai khan cheng nuai 2500 chuang an sanction tih sawiin NIT Mizoram Campus sak hna pawh chhonzawm ani dawn tih a sawi bawk.

Pu Lalduhoma chuan sorkar hna lakah an fimkhur zel dawn tih sawiin fair takin department tinah kalpui ani dawn a ti a, thalaite tana thawh tur remchang siam kawngah theihtawp an chhuah zel dawn tih a sawi bawk.



NATIONAL EYED DONATION FORTNIGHT

Mizoram Mit pe tura intiam mi 9231 awm tawhin mit thlak ngai in ziaklut mi 391 an awm tawh a, kuminah mi 32 in an mit an pe tawh a ni.

Vawiin khan National Eye Donation Forthnight Programme hman niin hetah hian mit thlak sak tawh mi 593 an awm thu tarlan a ni a, heng te hi Civil Hospital, Aizawl, Sri Sankaradeva Nethralaya, Guwahati, Eye Care Hospital, Aizawl leh Synod Hospital-ah te tih a nih thu an sawi a ni.

National Eye Donation Forthnight Programme vawi 40-na ah hian Dr. Lily Chhakchhuak chuan midangten khua an hmuh theihna tura thih hma emaw thih hnu emaw a Mit donate uar sauh sauh turin mipuite a chah a. Mit pek chungchanga hriattur pawimawh hrang hrang te sawiin mi tupawhin Mit a pek theih a, mi a thih atanga Darkar 6 chhunga lak tur a nih thu leh Mit pe tura in register tawh ten chhungte hnena hrilhhriat a tul thu te, Mit pe duh emaw, pek ngai in register duh te tan biak theih reng an nih thu a sawi a, India ram state zawng zawng Eye Donation lam endikna-ah a ti tha zual 15 zingah Mizoram chu kan tel ve thu sawiin thawktu zawng zawng te thawhrimna-ah lawmthu a sawi bawk.

National Eye Donation Forthnight hi kum tin August ni 25 atanga September ni 8 inkarah hman thin a ni.



GST

Ramchhunga state hrang hrang Goods and Services Tax dinhmun tarlanah Mizoram GST chu thla 4 chhung a zawnin a tlahniam a, Hmarchhak State dangte chhiah khawn tla hniam awm ve bawk mahse Mizoram tlak hniam dan anga hniam a awm lo a ni.

Kumin Financial year 2025-26 thla 4 chhunga Mizoram GST khawnin nikum 2024-25 thla thum chhung khawn a phak lohna April ah (-) 28% a ni a, May ah (-) 26% niin June ah (-) 29% leh July ah (-) 21% in a phak lo a, State dangte nen khaikhinin Mizoram GST chhiah khawn hi a hniam hle a ni.

Ramchhunga state hrang hrang Goods and Services Tax dinhmun tarlanah Mizoram GST chu nikum 2024 July thla chhunga khawn aain za zela -21% in a tla hniam a, nikum July thlaa GST khawn hi cheng vbch 8 zetin a phak lo a ni.

Voicecast

Ministry of Finance tarlan danin India ram chhiah khawwna atan July 2017 atangin GST hman anih hnuah rampum huapa GST khawn chu a pun belh zel a, nikum 2024 July thlaa GST nena khaikhinin a punna chu za zela 7.5 % a ni a, Thla 4 chhung (April leh July inkar) chhunga India ram GST khawn zat hi cheng vbch nuai 10.7 a tling tawh a, nikum hetiang hun chhunga khawn zat cheng vbch nuai 8.18 a ni.

Ministry of Finance tarlan danin nikum July 2024 thla GST chhiah khawn zat kumin July 2025-a khawn tling lo state 9 an awm a, nikum khawn zat phak lo nasa zualah Manipur minus 36% leh Mizoram (minus 21%) chu langsar zual a ni.



ZPM ANNOUNCES CANDIDATE FOR DAMPA BY-ELECTION

ZPM chuan vawiin khan Dampa Bial MLA by-election lo awm tura an party candidate turin Pu Vanlalsailova an ruat thu an puang.

Byte : ZPM President Lalliansawta

ZPM President Pu Lalliansawta chuan vawiin khan Party chhung inkhawmah Dampa Bial by-election a an candidate tur chu Pu Vanlalsailova a nih thu a puang a, Vanlalsailova hi MLA inthlan hnukung ber khan Dampa Bialah hian ZPM ticket-in a ding a, MNF candidate boral ta Lalrintluanga Sailo a hneh zo lo a ni.

Dampa bialtu MLA Pu Lalrintluanga Sailo hi July ni 21 khan a thi a, by-election neih a ngaih avangin inbuatsaihna kalpui chhoh tan niin hmalakna kawng hrang hrangah neih a ni a, Election Commission of India in Dampa bial by-election neih hun tur hi a puang thuai tura rin a ni.

Hetihlai hian eptu party Mizo National Front chuan an party candidate tur chu nomination committee in Assembly thutkhawm zawhah a ngaihtuah tur thu an sawi a, Mizoram Pradesh Congress Committee chuan candidate tur an ngaihtuah mek tih sawiin Mizoram BJP pawhin candidate an neih ngei tur thu leh search committee din in hma lak mek anih thu an sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MIZORAM AMONG MOST FORESTED STATE

Mizoram chu ramchhunga State leh Union Territory hrang hrang zingah ramngaw nei tha ber pawl a ni a, DoNER Ministry tarlan danin Mizoram hian ramngaw za zela 84.53% neiin state zingah ramngaw nei tha ber a ni.

Ministry of Development of North Eastern Region tarlan danin Lakshadweep chu ramngaw nei tha ber niin za zela 91.33% ramngaw an nei a, Mizoram in dawtin za zela 84.53% niin of Andaman & Nicobar chuan za zela 81% a nei bawk.

Voicecast

Ramngaw tha zawk a awm theih nan Mizoram sawrkar chuan hma la zelin kumina Green Mizoram Day ah pawh hmun hrang hrangah thing tiak phun a ni a, "Ruahtui khawl nan thing i phun ang u" tih thupui hmangin District tinah beihpui thlak a ni a, thingphun uar kawnga inzirtirna hmun hrang hrangah neih niin tunlai khawvel sik leh sa inthlak zelah ramngaw leh nungcha venhim kawnga hmalak thar a pawimawh thu inzirtir niin hemi kawnga hma la turin sawrkar chuan nasa takin ke a pen dawn tih an sawi bawk.

<><><>

INDIA & FIJI

India leh Fiji chuan vawiin khan rinmena thuthlugn chi sarih an ziaak. India tlawha lo zin Fiji Prime Minister Sitiveni Ligamamada Rabuka leh Prime Minister Narendra Modia te vawiina New Delhi-a an inbiak hnuah heng thawhdunna tur inremnate hi ziah a ni a. Thuthlung ziah zingah hian Health lamn tihchangtlunna tur a tel a. Prime Minister Narendra Modia chuan Fiji khawpui Suva-ah khum 100 awmna Speciality Hospital din a ni dawn tih a sawi a. Hei bakah hian ram pahnihte hian cybersecurity leh data venhimah thawhdun an remti a, firfiakte do kawngah tandun an rel bawk a ni.

(Byte)

Prime Minister Modia chuan Fiji chuan ram pahnihten ralthuam leh venhimna lama an thawhdunna tihchangtlun an rel tih sawiin hemi atan hian ruahmanna pawh an neih thu a sawi a. Sik leh sa inthlak chu Fiji tan a pawl thei tih sawiin ram pahnihten energy thianghlim hman kawngah thawhdun an tum tih a sawi a. India leh Fiji chu International Solar Alliance, Coalition for Disaster Resilient Infrastructure leh Global Biofuels Alliance an tel ve ve tih a sawi bawk a ni.

<><><>

ED

Enforcement Directorate chuan vawiin khan Trinamool Congress MLA Jiban Krishna Saha chu West Bengal School Service Commission (SSC) zirtirtu laknaa hlemhletna thilah an man. Krishna Saha hi

Murshidabad district-a a chenna Burwan-a a chenna inah ED te hian an
man a ni.

